

tionem ipsorum actu in ijs, ex quibus fiunt, præ-  
 existentium; sed per veram & substantialem, ex  
 eo quod non est tale actu, sed potest fieri tale, in  
 id quod est tale quid actu, & vice versâ, mutatio-  
 nem.

§. 1 Priusquam mutua elementorum transmutatio adstruatur  
 hoc necessario cum Aristotele *l. 3. d. Cælo c. 6. & l. 2. de gen. & cor. c. 4.*  
 probandum: elementa non manere perpetuò eadem, sed generari &  
 corrumpi. Quod in igne manifestum: ignem enim gigni etiam sen-  
 sus ipse approbat *l. 2. de gen. & cor. c. 4.* ignem quoq; corrumpi duo-  
 bus modis videmus, nam & à contrario extinguitur, & à seipso  
 marcescens *l. 3. de Cælo c. 6. l. de vitâ & morte c. 5.* Si autem unum ex  
 elementis generatur & corrumpitur, quæ ratio diversitatis, ut cœ-  
 teris idem non eveniat? imprimis, cum id ipsum ratio ab ipsâ ele-  
 mentorum naturâ petita evincat: hanc enim talem habent, ut eam  
 amittere & rursus recipere possint: ignis sanè levitatem calorem &  
 siccitatem suam, aqua gravitatem, frigus & humiditatem &c. amit-  
 tere potest, at quis tunc ignem & aquam manere ignem & aquam  
 dixerit, cum gravitas & levitas, calor & frigus, humiditas & siccitas  
 ipsas essentielles formas horum corporum constituent. *ut. in disput.*  
*de nat. elem. visum:* Posse quoq; elementa ad naturam suam transi-  
 re, adeoq; rursus generari, qui generationum circulum & vicicissi-  
 tudines rerum generabilium & corruptibilium expenderit, non ne-  
 gabit. Propterea etiam elementa talem materiam habent, cui con-  
 trariæ formæ vicissim inesse: & rursus in eâ destrui possunt, sicut ea-  
 dem ceræ massa contrariarum formarum capax est. *Vid. alleg. disp.*

§. 2 Idem etiam ex alteratione elementorum consequitur.  
 Nam si elementa alterantur, quid vetat, quo minùs etiam generentur  
 & corrumpantur, cum hæc tam arcto & individuo nexu cohæreant,  
 ut, si generatio & corruptio eorum negetur, etiam ipsa alteratio in-  
 dubium vocetur *V. l. 1. de gen. & corr. c. 1. l. 2. c. 1. & 4.* Simplicem  
 enim habent naturam elementa, quæ si à contrario alterentur, &  
 alteratio ista diutius continuetur, necessû est, ut tandem tota eorum  
 natura mutetur, & contraria in eandem materiam inducatur. Nam  
 sicut alias omnis generatio & corruptio alterationem præviam ex-  
 postulat:

SA